



# Editorial

## Chingthei taka hinkhua mat di

### Jeremia 17:21

Amasan Nute Ni Chibai..

Tulai khawvel pumpi buai leh lau thawng taka hinkhua amat zinglai ah buaina awng kal ah Nute ni mu thei leh mang kit thei ta ding ah hun kipak um ei musak Pathian lopina i piau ahi. Hunte hung chia zel in gam din mun i et chun phat lam sang in siatna lam ama naw zaw. Khawvel natna hipi ziakin nisin in mihing a sing a sang ah buaina atuak zing lai un, Lalpan i hinnau ei venbit piak ziak un avel in lopina leh chawihawina ipia kit hi.

Bible ahin chingthei tak ah hinkhua mat angai dan thu hi mun tam tak ah mu ding a um ah. Chun, Bible ahin chingthei tak ah hinkhua mat nachang helo tam-takte lakin khenkhatte chu; Lot, Samson, Saul, Ahab leh Jezebel te, Anania leh Saphirate, Juda lskarot leh midang tamtak le i mu thei ui. Chun, hinkhua chingthei tak ah mang tamtak le i mu kit bawk hi. Joseph, Samuel, Nehemia, Danial leh alawite, Paul tite hi Pathian lau leh a hinkhua chingthei tak ah mang mite Bible ah i mu teu chu ahi.

Hinkhua chingthei tak ah i mat theina ding thu neu khat

taklang hitiu:

- i) Nek leh dawn chung chang ahin pilvan a pawl maw hi.
- ii) Chep leh muam, khamthei thilte laka i hinkhua hi chit thei ding ahi.
- iii) Taksa nawpna matsual theina lak ah chitthei ding.
- iv) Gawlgukna leh nekgukna lam ah chitthei ding.
- v) Midangte hinna lak piak nawpna lungthim nei guatlo ding.
- vi) Midangte thil guknawpna lak ah kikawikang ding.
- vii) Lepchia gen mai nawpna lak ah te kigawl khaklo ding.
- viii) Kochuam leh sorkal in a phallo, thil zawk leh chawk nawp-

na lak ahte i hinnau hi chitthei ding.

ix) Mipi laka pau dan chitthei angai hi

x) Lungthim thiango nei ding ah chitthei angai hi.

xi) Hun mat dan ahi i chitthei ding.

Gingtu hinkhua chiato zel na hin pilvang taka khaw-sak apawi maw hi. Chun, du am takluat ziaka i mawpuakna apat khiakthak kit ziang abailam hi. Khawvel nawpna leh سوالنا lungthim hi setan ah kipat hung

um ala hi kha thei ahi zia in, i hinkhua mat dan ua hin ngawlu-huai taka umlo in pilvang tak a um akul hi. Hinkhua pilvang taka manglo te chu Lalpa'n a haw in adin mun ua pat apai tha kit sek hi. Lalpa lunglam hawl ah hinkhua chingthei taka mangte chu Lalpa'n damthei na tawh ama lam un lawtinnan adel zui sak sek hi.

--o0o--

## Thupi: Khristian Lamkai Hina leh Mawpuakna

(Lk. 22:25 - 27)

By: Rev. S.T. Kaia Vaiphei.

**Thumapui:** Zia thupi a hin ka tuppen chu tulai kochuam ah lamkai Pastor, Upa, Tual upa leh lamkai hina chuam chuam tuk Nu lam leh Khanglai lam ten Lal Jesu I hotupau entawn in I hinau leh I mawpuaknau I kihiat theina ding uh ahi. Lamkai/hotu ti hi genchian masa pen hitiu in, zaw leh Khristian hotu chu bang gual hi ding a hem ti leh hotu hitheina ding ah titna gen in a tawpna'n a nasep ding uh gen ding I hiu.

**1. Lamkai/Hotu chu bang gual mi a hem?** Ei pau ah 'Lamkai/Hotu' ti paukam hin thuneina lam a kaw k deu a, 'lawi upa' ti hin a group /mipi lak ah pang, a challang pen hina a kaw k kit a, lamkai ti hi I thupiu hi tawh kinai pen ding dan ahi. Lamkai ti chu sep leh bawl, chiana vakna leh bangkim ah a masapen hi ding tina ahi. Lamkai ti hilchiana pathum vak gen hi tiu:

- i) lamkai kiti chu a lampi he sa, ama le chia ah mite a nung kizui sak thei chu hotu ahi - John R.Mott (Lamkai).
- ii) Lamkai chu mi a sep nawp lo sep sak thei chu hotu ahi- President Tuman (Hotu).
- iii) Lamkai chu mipi kivaipuakna ah mawpuakna mala ah midang tawh kithua ah mipi chu

bang ahem thil tup khat sep daw sak chu hotu ahi – P.G.Viwcharuk (Lawi upa).

### **2. Lamkai/ Hotu Chini:**

**i) Born leader:** Lamkai/Hotu hina chu mi'n a pianpi ahi. Mi chungchuhuang ah bawltheina (talent) nei ah hung piang a, chitna leh theina bik (ability) nei ah hotu chu a hung pianpi ahi. Zia gual mi chu a tam pua, etsaknan Solomon chu Pathian in a mite puina ding ah pilna a piak chuam bik ahi.

**ii) Train Leader:** Zia gual lamkai/hotu hi mi chungchuang ah chitna leh thiamna nei a hung piang hi diak lo, mi khat chu a kihazil ziak a hem, ahiloleh a bawl mun phat leh a experience dan zil ah sep dan bawl dan leh mipi puidan hung thiam a, lamkai thei hung

ting chu ahi. Zia gual chu nang leh kei le I hithei chiat ui.

**3. Khristian Lamkai/Hotu:** Lamkai/Hotu chiat chiat le kochuam ah lamkai leh kipunkhawmna (Orgns.) chuam chuam ah lamkai/hotu chu a kibatlona lian tak a um hi. Khristian lamkai/hotu ti hin thuneina lam a kaw k pua, sep leh bawl ah a mala pan lam a kaw k zawi (Lk.22:25-27). Jesu chun a nungzuite keng a sil piak a, zia chu “La ettawn ding ua, khat leh khat keng la kisil piak tuana ding ua ka bawl ahi” a tii (Jhn. 13:13-16). Khawvel ah sakhua tamtak lak ah Khristiante bep hi I lamkaiteu ‘suak’ ti ah kote chu I hiu ahi. Paul in ‘Khrista suak’ a kiti ahi (I Kor.3:5, II Kor. 4:5). I sakhua lamkaite I konau sangpen chu minister a hia, zia chu le ‘naseppiaktu’ tina ahi. Gk. pau ah naseppiaktu chu Diakonia a ki tia, a hung kipatna chu Diakonon ti a pat hung kipan a hia, zia chu suak tina ahi. Thuthung Thak in Diakonia hi ministry ti in a letdawk ua, zia chu nasepna/rawngbawlina ti ahi. Tichun minister chu bang ka hun bawl piak thei diam ti ah dawkan/table ah a la ngaktute chu a hiu.

Khristiante lamkai hina

dan hung kipatna chu Jesu Khrista ahi. Jesu Khrista zuitute I hiu a, ama ngei in bawl dan ding uh ei nunmu gual ah I bawl ding uh ahi. Kua na seppiaktu hi ding I hiu em I ti chun a masapen ah Jesu Khrista naseppiaktu I hi bak un I kochuam mite, insak inthang, panpi ngaite leh I umkhawmpite naseppiaktu ding I hiu (Mt.25:34).

#### **4. Bible ah Hotu Pathum:**

**i) Mosi:** Israel chate chu Amalek mite tawh a kido lai un Mosi chutang in a chia to a, a khut a zak lai sia Israelte chun a naw ma ma ziang sek ua, maleh a ban a hung kham a, a ban a khiak niam tak leh Amalek miten a hun naw kit sek uh ahi. Zia phat chun Hur leh Aron chun Mosi chu a chut sak ua, a khut a dawp piak uh ahi (Exo.17:8-16). Zia hin a etsak chu Hotute hin a chang ua zawna a chang thei puau a, I zathuap ua, Cooperation I piak lo uh ahi chun pawlpi lawtinna a um thei puai.

**ii) Gideon:** Vaihawmte hunlai in Israelte chu hun sawttak chu Amalek mite khut nuai in a um tau a, Gideon malatnan Amalek mite a do ding ua chun Gideon in “Ka bawl gual gual la hun bawl ding uh” tin a mite chu a nung a kizui

sak hi. Tulai hotu tamtak hin I mite ahiloleh chate kiang ah “Ka bawl gual gual hun bawl un, ka nung ei zui un” I ti ngam diam uh? Zia gual chu ti theilo ding tamtak I um uh ahi (Vaihawmte 7:17-21).

**iii) David:** David chun a sepaite gal a do sak a, a sepaiten gal a do khawk lai tak un ama chu in ah a mawk um a, Bethseba insawng chung ah ksil a mu, a dawicha ta, a tatsualpi a, ama ding in Pathian in a demna leh a insung a chemsau len khawlawna a hung hi ta ahi (II Samu. 11:1-6). Hotu chu I mite thu pia ah na sep sak ah eima mawk umlo ding ahi. A mala pen ding I hiu.

### **5. Lamkai ding ah Titna (Qualification):**

Lamkai hitheina titna tamtak um maleh a nuai a hin a pawimaw diakte bep vak taklang hi tiu. Ziate hi lamkai khat in a tak-sap ahi chun lamkai tasam ahi mai sek hi.

**1. Taksa leh Thagau ah Pitinna (Maturity):** Lamkai ding chu umchan det, a thugen tudet, mi kikhel thepthup ahilo ding ahi.

**2. Hangsan (Courageous):** Thudik hangsan tak ah panpi ngam mi hi ding ahi. Eg. Martin Luther.

**3. Kingaitawm (Humiliating):** Lam-

kai ding chu Jesu, Baptistu Johan leh Paul te gual ah mi kingaitawm hi ding ahi.

**4. Mi Kithunun zo (Self Disciplined):** Thupil in “Mi ama kithunun zo mi chu khawpi khat va do zotu sang in a hat zawi” a ti ahi. Paul chu ama kithunun gua in a taksa chu a kichum sek ahi. Thilpha bawl ding he ngal ah kithunun zolo mi chu hotu taak ahi puai.

**5. Mulawkna (Vision):** Lamkai chun thil hung tung ding chu a mulawk a, zia chu tun theina ding ah mipi chu a pui ding ahi. Mosi chun Israelte chu a zawtpina gam chu a hechian ma ma ahi.

**6. Milung Chawktho (Motivation):** Pawlpi in a pawimaw bawl ding zosia chu thil thatnawp um ahi suak pua, lungla um tak himaleh nung ah phatna ding chu gel a, thada lungkhete chu chawtho ding ahi.

**7. Thupukna siam (Decision making):** Lamkai khat chu mipiten a buainau a hung dawt tak ua leh ka he puai ti mai lo in thupukna siam ziang thei mi ahi ding ahi. Zia hin thil zosia hesuak mi ahi ding tina ahi chuam puai.

**8. Hepina nei (Having Sympathy):** Kei ka hi thei phawt leh mipi a suak suak suak tan a ti a mi hak-

satna hepina nei theilo chu hotu ting ahi puai.

**9. Ngaidam thei (Forgivable):** Mipi nasepna leh umdan chu dawigual chet ahi lo hun a le ngaithiamna nei a, ngaidamna bawm ah khum thei mi ahi ding ahi.

**10. Taksan um (Confident):** Lamkai chu mi muan ngam, mi ginchak um ahi ding ahi. Min ei taksan hi lawtinna lopi tak ahi.

**11. Mi Lungthiang (Open Minded):** Lamkai chu mi lungthiang ahi ding ahi. A lung gel chuam, a kam ah a gen chuam ahi lo ding ahi. Mi gen ngailo ah ama lung-gel bep pha kisate chu lamkai a ting thei puai.

**12. Thuak hat leh Hil thei mi (Patience & Teachable):** Min a thil bawl a dem piak tak leh le thuak hat a, lungtup mualsua masia ngak hat a, bawzui zing a ngai hi. Chun a bawlkhial min a hil lehle hilna ngai thei mi ahi ding ahi.

**13. Gensiatna Ngaithiam leh Nuak bai lo (Accepting Criticism):** Lamkaite hin dem a law nuam ma mau a, zia gensiatna chun nuak mai lo in, a diklona min a gen chu pawm a, kisuk dik a guat ding ahi.

**14. Vaihawm dan he mi (Administrator):** Mipi lak a chun lung-

put dan, khawsak dan, dawidan kibang lo tamtak um ahi ziak in a tangpi chiatheina ding vaihawm dan thiam chu hotu na pawimaw tak ahi.

**15. Ama leh a pawlpi hechian (Knowing oneself & the Organization):** Mihing hi ama kihechian lo tamtak a um a, hotu khat chun a mizia, a talent, a capacity a bawl thei tiang a kihiat ding ahi. Pawlpi in a sepzaw ding tiang leh bawl ding dawl hiat a ngai hi.

**16. Tupna Kichian (Fixed goal):** Hotu khat chun ama mimal hi hen la, pawlpi ding hiziang lehle tupna mumal tak a nei ding ahi. Tupna a mumal lo chun lawtinna a um tak tak thei puai.

**6. Hotu Bawl ding (Functions):**

**1. Planning:** Lamkaite nasep ding pawimaw masapen chu guang-galna ahi. mipite/kochuamte chun hawitakcha na a sep theina ding ua, sepguan pha nei a ngai hi.

**2. Guantupna (Organizing):** Zia hin a huap chu a sepna ding mun uh guan tup a, a sep ding dan uh gel fel a, a semkhawm ding mi guat tuak a, a sep theina lam uh /a thiam lam uh guat piak a huam vek hi.

**3. Et tuupna (Evaluating & Controlling):** Zia hi l ngansiana gual in a sem nau em, a sep ding dan uh kigen gual in a sem nau em, a leng un a sem nau em, hun kipia sung in a sem zo nau em ti et tuup chu ahi.

**4. Thubuai Sutthap (Solving Problem):** Mipi kipunkhawmna hin thubuai a tam nuam sek a, kochuam hihen la, organization hilehle a active po leh thubuai le a tam ziang sek a, hotu chun a suk navak leh kipunkhawmna chu a hat mai sek hi.

**5. Midang siamdaw (Developing others):** Tunung leh midang hotu hung hithei ding ah siamdaw hi pawimaw tak ahi. Hotu khat chu lawting ma ma lehle a nung ah ama thasang ding a kisiamdaw theilo chun hotu lawting ahi thei puai.

**6. Ettawn taak Hinkhua (Exemplary Life):** Genthiam leh genhawi sang in le eima ngei in a practical ah bawl chu min a zui thei zaw, hotu khat ding ah mi ettawn taak ah eiman hinkhua mat hi thil pawimaw tak ahi. Action speaks louder than words ti ahia, sermon evaluation nan le a gen sang in ama hinkhua chun mark a paw tam zawi.

**7. Hun matdik (Punctuality):** Lamkai khat vaigei zing ziang, gen leh sak a eima dutui ziak a midang a ding gel lo hi hotu tamtak lawsapna ahi.

**8. Sum ah Ginum (Stewardship):** Kochuam sum etkawlna hotute chu a ginum ding uh ahi. Sawmakhat piak ding ti gen zing ziang sang in a pete min a zui thei zawi. Sum matna pil thei a ngai a, sum bat le ginum tak ah a hun tak cha dit sek ding ahi.

**9. A Ding dawl kihiat:** Gen ding dawl, sep ding dawl, chutna ding dawl kihiat hi hotu ding ah thil pawimaw tak ahia, zia chu tak-sap ziak in kochuam hotute dem l kai sek uh ahi.

**10. Mi khen neilo (Partiality):** Kochuam ah lamkai tamtakte lawsapna pen chu kihotheipi bik leh kihotheipi lo bik nei leh chia nuamna in leh chia nuam lona in nei hi ahi.

Zia thupi sim khate zosia taksa leh thagau lam ah mi ettawn taak Khristian hotu pha hi theina ding in Lalpan malzawl ta hen, Amen.

## PIANTHAKNA

Jakob 4:8; Ephesa 2:10.

~Rev. Seilunlal Vaiphei

Tulai gingtuten Camping leh Crusade vel ah akineppisek pianthakna chungchang gen khawm ding ihu. Gingu mimal hinkhua a pawimaw ma ma gualin a lawm a hinkhawmna aselam hilo a naupang neu a kipat sungkuan kikaihuaina pha pawimawna tak zil ding ihu.

Pathian in mimal dawtna angaithak diak lo lai inle a lawmpi a dawtna hinkhua angai pawimawi ti kochuam hung piandaw akipat in akichian mama hi. Zia-ziakchun, mimal chuam chuam um khawm kochuam hinna leh khawtang hinkhuate hi apianthak a pawimaw zia zildaw apawimaw khawp mai hi.

Gingu nungak tangval laka damdawi khamthei hi zawngsakte, zu dawn sekte leh gitlona chi chuamchuam hisekte hi bang ziak pen a ahiu ahi in la gingcha em? Piangthak laka zia gual hi hih um dingin la gingcha em? A pianthak lo ziakua a hi sek uh hinna maw? Khamthei chingthe hi gam leh nam apui kawi ua, khawtang apui kawi ua, amau hinkhua na tiang ngei le pui kawi tu ahi. A hileh zia haw chu hilona dinga kivenna phapen bang hi dingin la gingcha em? Pianthakna hingei ina. A nuai ah gual

ahin Pianthakna chungchang vak ngaitua khawm hitui:

**i) Pianthak um zia:** Pianthak hi bangtina a hi em? Pianthakna chu Pathian hing chapa Jesu Khrista ah piang' tile hin chawmkim kichian pen ina. Mihing hung piang hin gitlona lama awn ihi mai ua, Bible ngei inle, "Ngaitia, khawlona siamin ka um a, ka nu'n gitlona gilpi eivawp a" ti a um kha(Sam 51:5). Zia chun mihingthe hi Pathian panpina panglo in l phataktak thei puau ti ei hiatsak ahi. Maleh Jesu Khrista ginga, Pathian cha hina ihun chantak hin chuh Khrista ah l piang ua, piangthak l hung hitau hi.

Lal Jesu ngeiin, "Pa'n apanpi lo chun kuama ka in hungthei puana" atia. Pa panpina dawng ding achun Lal Jesu ah pian a ngai hi. Lal Jesu ah piang umzia chu Jesu daw dan a hing leh um tina ahi. Jesu dawidan kha l hinkhua hindan leh



thil hidan zosia ah kaihuaitu ahi zel chun Jesu ah I piang hi tina ahi. Zia gual chu hidingin mi Jesu Khrista kiang in akitulut sek uh ahi.

**ii) Khristian sungkuan:** Khrista a dinga hing dinga Khrista ginna taktak a pian hi pianthak hina ahi. Danglam gut khel chu apawimaw khello maithei ahi. Gitlo lampi zui ngatngat sek leh kikhawm ngai keilo a ding a chun a danglamlo thei lo ahi sek hi. Maleh, naupang neuca akipat ah sungkuan ah nu leh pa kaihuaina akipat min Khrista ginna det anei chun zia chu Khrista ah pianna, pianthakna ating ahi. Sungkuan tinte hi eima cha leh naute hi Khrista ginna piansak ngei hi I mawpuaknau ahi. Zia guala nau etkawlte chu Khrista ah apiantak ziakun a chuam a pianthak kit khel kinep ding a hi pua, akul khel diak puai.

Ahinla, mitamtak chu insungkuan zilsakna pha dawng khello a um ua, nu leh pa Pathian ngaisak lo a hivang ua chun a chateu thagau lam dinmun chu ngaitua um khawp mai ina.

I nausen laiun inu leh pa ahem, a hiloleh ei enkawltute'n kochuam a baptisma eichansak

ua. Baptisma ei chansak ding ua khan Pastor-in, “Zia nausen hi... ahung pitin masia I Lalpau Jesu Khrista hiatna leh ginna kaihuai zel la tiam uh em?” tiin a dawngsek a. I nu leh pate chun, “tiam e,” tiin a dawnhuu va. Zia-tak a athutep uh chu nu leh paten azawp zello ua ahileh chu Jesu Khrista hiatna leh ginna chun piangin I khanglian thei seklo uh ahi. Pianthakna lam a hin nu leh pa mawpuakna, sungkuan mawpuakna alian khawp mai hi.

**iii) Gitlo hi kihiatna:** Pianthakna chang ding a chun mi gilo ihizia kihiat a ngai hi. Gitlo hi kihiatna hi thilhikhiat ihi lamle I kihiat madai in I pian phung in gilo sa ahi ta. Ziaziakchun, I thil hikhiat hekhello leu hinle, ihina gilo zia kin hukdam ima maw chiat uh ahi.

--o0o--

# MI PIANGTHAKTE HIN DING DAN

I Thes. 5:22; IPet. 1:14-16.

*By: Rev. Seilunlal Vaiphei*

Bible ahin mi piangthak, hukdama umte din mun ding kichian takin ei gen uau, ziate chu ala en khawm hitiu. Sawlchak Paul chun, 'thil phalo lam taphawt ah kipat in kikoï kang un' tin ala gen hi. Ka pianthak nak leh thil phalo bawl kha thut ziang ma leng hukdam chang kahi tho tho ding ahi ti tawh Paul thugen hi kibang lo ahi. 'Thilphalo lam taphawt ah kipat in ka kikoï kâng ta'n', suicide ah thi himaleng hukdam kahi ding ahi tia kigen hi kithepna ahi. Peter in, 'la hiatlo lai ua la nawpnateu ah um talo in, a hun kopa athiantho gual in, nang uh le la tawidan zosiau in thiangtho tau in' tin ala gen hi.

Bible in mi piangthakte dinmun ding ala gen tawh tulai mihemte'n iki zil tilnau, drugs ah thi maleh hukdamna mu tho tho ding ahi tia igen sek uhi kibang theilo ahi. Pathian thu chun, 'chutichun, la taksau ah leilam thil doina umte hi that un: Tatsualnate, buaknate, huknate, nopna phalote, papnate chu milim hona ahin', zia zosia hi thi sak gam un ti'n ala gen hi (Colossa 3:5). Zia nahin imu daw thei khat uchu, Colossa mite kiang ah Paul thugen hi tawh tuhun ah mite thugen hi kibang theilo ahi.

**Mi piangthakte chu a thagau chau thiangtho ding hilo, a lungthim leh a taksa tiang ah thiangtho ding ahi:** Gitlona

thi'san ah, dikna ah i hin zawk theina ding un, ama ngei chun kros ah khan a taksa ah chun i gitlona a paw tai. Ama beliamte ziak ah sukdam in la um tau ahi(IPet 2:24). Ziakiachun, mi piangthakte chu gitlona lam ah athi a, chiadan phat na lam ah a khanlet zel ding ahi. Ephesa 4:22-24 na'n, 'La nidang lai hindan uh, la mihing lui uh zuauthei leh hukna ah pui mang ah umsa chu liptha ding leh la lunggil thagau uh chun hin thak ah um in, mihing thak, diktatna leh thianthona Pathian kibatpi ah siam ah chun kivan tau in' tin Paul in mi piangthakte chu tilkho na ala nei hi. Pianthak masang ah umdan diklo leh phalo te gual ah um

zing ding in ei daw i lo ahi. Bang hun hi ziang maleh le gitlo hi ding in ei phallo ahi. Chun, pianthak-na le a mangthei kit talo ahina le agen kha diaklo ahi.

**Mi piangthak hinung inle taksa lam lunggulna leh gitlo nasep-nate'n nisin eidel zui zing ahi:** Gingtute chu ginna ziaka hukdam leh thiamchang ihu. Himaleh taksa khawsa ihi ziakun i nisin hinkhua mat nau ahin khawvel nawpna leh gitlo thil bawl nawp-nate tawh khawsa khawm ihi zing ziakun Pathian Thagau thiango panpi na zal ah zaw guat ding ahi.

Nisin gitlona'n i chung ua sumpi gual ah zing sek, i hinkhua ei suzawngkhal zing thepna hi Israel ten canaan gam azawtlai ua haksat genthei ala kimaitua piu gual chu ahi. Ziakiachun, i chia zing lai ahin thepna leh gitlo na'n ei ki puk sak kit thei ahi ziakin pilvang taka i khawsak diu apawi maw ma ma hi. Ngaisaklo leh pilvang taka i khawsaklo uh ahi chun ki puk kit ngei ngei ding uh ahi. Hatlo leh taksap ziaka ki puk ni chu um ding ahia himaleh i kipukna pat i din daw kit a Khrista thupiak gual ngei ah i um kitthei chun mangthailo ding ihu.

**Hepina ziaka hukdam i chan uh hi gitlo bawl thei kit na dinga phalna ei kipia ahi puai:** I gitlo nau apat thiamchang ihung hi kit thei na ding un achapa thing cross ah hung kikhen den hin gitlo i bawlthei kit na ding un phalna eipiak ahi puai. Johan 8:11 na imu "Lal Jesu'n numei khat angkawm ah kiman kiang in ka ngaidam hi, chia'n la, gilo kit takin" ati. Hukdam a um mi piangthakte chun gitlo nasepna zosia ahaisan anutsia ving veng ding ahi. Gitlo anutsia ding chau hilo in, ahun masate ah ala hi khak ngailo thilpha bawl nalam ah khanglian deu deu ding ahi.

Ephesa 2:10 nan ala gen, "Thilpha hi ding ah Khrista Jesu ah chun siam ah um" ihi dan teu mu thei ahi. Mi piangthakte chun thilphalo zosia aki hei mangsan ah anutsia ngai ahi. "Chutichun, engsiatna zosia, gukkhelna zosia, lepchiana zosia, enna zosia leh gensiatna zosia haisan un. Hukdamna la khanlet theina ding un, nausen piang limte gual in, thagau lam nawitui thiango ducha zing un" tia Peter in eila hil uh ahi(I Pet 2:1-2).

**Thukhakna:** I khualzinnau khawvel ahin, Vangam ah go i

neithei na ding un khawvel than-  
gailo ah thiangtho taka i khaw-  
sak diu ahi. Hukdam chate chun,  
ginna ziaka thianthona tawh  
phat nalam ah Pathian chanchin-  
pha tawh kituaka malam ah kal  
isuan zel ding uh ahi. Mihing  
pilna leh hiatna achun, gitlo ka  
bawl tapuai ti ziang leu hinle  
pilna taksap ziaka thepna i tu-

akteu apat ziltilna diklo zui zing  
kawm ah kipak leh tai taka thim  
nuai ah leng leh khawsa ala kiki  
khasek hi. Pathian thu thiang in ei  
hilna gual gual ah, thildang sang  
ah Bible in ei hilnate hi ki suan-  
pi zing kawm in malam ikalsuan  
zing ding ahi. Zia phat chuleh  
hukdamna bukim nei ah Pa kiang  
lut thei ta ding ihu.

--o0o--

## **Cross bang ti'n la pu sek em?**

(Lk. 9:23)

*~Evan. L. Khotinthang.*

Zia articles ahin mi pathum Cross hung pute, abul lam ah  
ahung kitawn khawm dan teu leh ahat leh hatlo dan dungzui ua ama-  
sa-anunung a um dan uh, chuleh atawpna lam ah amau chungah  
bang atung em? ti'a a nuai ahin aban ban cha'n holimkhawm hitiu:-

1. Anunung lam ah a khatna pa'n a Cross put chu gik asak tak luat ziakachun a lawiteni a phazo talo in, khawsa-ul kai letlut in a nunungpen in apang mai tai. A lawitegel aphak zolo ziaka chun a thangtawm tinten zianga, phakteina ding lung agel zing lai chun, munkhat ahin Thing-at(Horai) amu'n, a changlam kai chu a at-tan mai ta'n, zia chun ahung jangkhai
2. Anunung lam ah a nina pa'n le ama sanga nunungzaw pa'n le jangkhai tak ah Cross apu'u amau tegel ahung makhel ziang chu a et leh lungnat leh thangtawmna'n a dim ta'n. Zi-aziakachun, ama'n le Thing-at chu ala'n a veilam kai leh a

lulam kai chu a at-tan kit ah, jângkhai tak in ahung taipu thaw ta mai a, a hatpen pa chule amakhel ziang ta, amasapen pa chu a nunungpen in apang ta mai a, amau tegel chu vang muphak le ahi ta puau a, atum mang ziang tau ahi.

3. A pathumna, amasa ah ahapen ah pangpa vang chu Cross chu giksa pumpum chun gim leh chawl takin khawsa-ul va chutchut pum in ahung pu'n, a nunungpen zing nalai hi. A gik takluat ziak ah chun a lawitenu chu a delpha mawng mawng talo ahi.

**Thukhina:** A hat leh nana chu Pathian kiang ala tung masa ta ngei ua, ahin Pathian chun a Cross hung puak uh chu a et leh Cross diklo gel ahung put ziak ua chun Pathian in ala sangthei talo ahi. Tunvak a guat nau leh thahat asuanate'u zosia chu a mawk mangthai gual ahi ta ahi.

Suapite haw! Cross diklo pute-ni chu leichung mihiam et dinga chun alung-gel thiam ua, hat le ahat bawh uh ahi. Ahinla, Pathian a di'n santhei ala hitalo ahi... Suapi..! nang in tuni hin bang ti gual Cross la pu sek em?

Entia...! anunungpen pa, a lawite ni'n ahung nutsia pau chu, gim leh chawl, khawsa-ul luang chut chut pum chun Pathian kiang ahung tung hâh ahi. Pathian in zia pa hung put Cross chu a en ah, dik asa- "Suapi pha leh ginum, la bawh pha ta luai; nangma neucha chung a ginumna hi, Keima'n tamtak chung a ka pansak ding la hi; nangma Pathian kipakna ah chun lutta'n" ati (Matt. 25:23).

--o0o--

**Missionary Day Sermon:**

**Thupi: Chanchinpha gen ding ah Sawlna  
(Rom. 10:11-15, Johan 20:21).**

- Rev. S.T. Kaia Vaiphei

**Thumapui:** Chanchinpha hung tun ni hi Missionary Day ti in I mang uh ahi. Zia ni hi missionaryten I gam ua chanchinpha a hung puaklutnau nikhua ahi. Chanchinpha hi a pawimaw ma ma, I gam leh nam tuni dinmun I phak theinau hi chanchinpha zia ahitawh kitawn in a hung pawlutte hi a pawimawu a, amau chu missionary ahi zia un Missionary Day ti in I gen zaw'u ahi.

**I Gam ah Chanchinpha Hunglut**

**Dan:** I nam sung in chanchinpha hi lampi ni in a hung tung a, khatna chu 16th February, 1894, in Arthington missionary, William Pettigrew chu Imphal, Manipur a hung lut hi. Zia hin Manipur Mal-Sua lam ah cheng, unau ngungal lamten Pathian a la awi uh ahi.

A panina chu kum 1910 in Manipur Simlam (Southern District) in chanchinpha a hung lut a, zia chanchinpha chu Watkin R. Robert, Aizawl, Mizoram, Medical Missionary, Dr. Frazer hung zuitu a pat ahi. Ama hi a hung pianthak zaw in chanchinpha gen ngaikhawkna zal in chawmtu le nei lo in ama leh ama hung kichawm ah Dr.Frazer nung hung zui ahi.

Kum 1908-1909, sung in Vaiphei tangval pani, Pu Thang-

kai leh Pu Lungpau lehkha sim ding ah Aizawl ah chia a um ua, maleh chawpna a neilo zia un hostel belnawt in a kilawfa uh ahi.Hun chawmkhat zaw in chawpna a hun muu a, lekha a hun sim tau ahi. Zia lai tak chun Senvon hausapu Kamkholun Singson in Aizawl ah missionaryten Aizawl ah nek chaw ding ah chiate Pathian thu a la puaksak sek uh chu hilchian ding ah a ko phat in, a mun he sa, Pu Thangkai leh Pu Lungpau chu hung puiin amaute gel chun lamkaal in Vervek khua'n a sa-awteu sut in baptisma chang in Pathian thu a hun awi tau a, tichun amaute gel chu Manipur simlam ah Pathian thu awi masapen a hung hi tau. Aizawl atun kitphat un Senvon ah chun mission field siam ding in Taitea, Savawma, leh Thangchh-

ingpuia-te hun pui in Senvon chu May 7,1910 in a hung tung tau a, zia ni hi tuni tiang in “Missionary Day” ti in mat ahi tai. Tichun I nam pumpi chu kum 50, sung in kristian I hung hi vek tau ahi. Tuhin chanchinpha hung lut kum 100 (Centenary) tin lawpna le lopitak in Lamka Public Ground in I la nei tau ahi.

**Jesu Hukdamna chanchinpha:** Chanchinpha hi sappau in ‘Goodnews’ ahiloleh ‘good tidings’ ti ahi. Chun ‘Gospel’ ti hile chanchinpha chu a hi tho a, zia chu Jesu hinkhua leh a nasep, a thidan, a thawkit dan chanchin mi pali Mathai, Marka, Luka leh Johan in a zikteu chu ahi. Eima’n I kisedaw, I kilaw daw, I thagim man, I sep gim man I mu hi law (pay) sepman ahia, chanchinpha akiti thei puai. Chanchinpha chu eima pang kei lo a, I phulo chung chung a lungsiatna zia ah midang zal I zawna chu chanchinpha ahi. Thil hi zia hileh mi khat to kisuang khan tin, ka kisedaw, ka kilaw daw ahi; ti kha ding ahi (Ephe.2:8). Ahin, hukdam hi theina ding achun bawl ding khat a um a, zia chu practical/action ah thilbawl ding hilo in, Jesu’n ei sepzaw piaksa chu taksan mai

ding hi ahi. Kisedaw ding hileh mi khat to a taksa zawnkhaal zia in a hem, a chatgat zia in ahem ah hukdamna ding kilawdaw k zolo khatto um kha ding ahi.

**Chanchinpha Gen ding ah**

**Sawlna:** Hukdamna chanchinpha hi a thawn ah I muu ahi zia kin ei un le henailote kiang ah a thawn ah I piak ding uh ahi. Jesun ‘Pan ei sawl gual in ken le ka hun sawl la hiu’ tin a nungzuite kiang in a gen a, zia chu tuni eimau kiang in le Jesun ei sawlna ahi. Khristian I hiu a, Jesu nungzuite I hiu chun ama I hotupau ei sawlna chu ngaikhawk pen ah nei in chanchinpha gen chu I bawl lo theilo uh ahi. Zia hi Jesun a nungzuite a thi ding kuan ah a thi thuvaithaakna ahi. Insung papen/nupen chu a thi ding tak leh a chateu tunung leh a khankhuu ah a hung khawsak to zel ding dan uh a vaithaak sek a, etsakna ding in ‘hung kilungsiat tuau in la, hung pang khawm un la, na zia gual hin hung sem un la, la naute hung sugenthei kin’ tite a thuvaithaak chun zia chu pitin tei ding in min kitiamna a nei sek a, a pitin tei sek hi.

Missiologist minthang, Emil Bruner

chun, "As the fire exists by burning, the church exists by its mission" a ti ahi. Zia chu 'Mei hi a ko lai sia a hin zing gual in, kochuam hile chanchinpha puanzakna ah sawlna zal ah hing ahi' tina ahi. Kochuam hi malam sawn zel ding ahia, a khangto zel ding ahi. A khanto lo ahi chun a keniam ahi mai a, a ngai ngai hi zing ti a um thei puai. Kochuam hi chanchinpha genna ah a luan-daw ding ahi. Tui hi luang daw lo ah a kitin den chun a gimsia mite dawn taak, duchat taak ahi ngai puai. Zia gual chun kochuam hile chanchinpha genna ah a lu-andaw lo chun kochuam chu a gimsia sek a, malam sawnlo in a mit pai ziang sek a, a kawu sawt ngai puai.

**Kuantu leh Sawltu:** Missionary nasepna ahin chanchinpha gen ah vakuan dawktu leh a sawltu, thilpiak leh pauchapna ah pangten Pathian ah lawman chan kibang a nei uh ahi. A sawltu um lo in kua chia thei ding ahem (Rom 10:14 ff)? Sum leh pai leh thawlawm thilpiak chuam chuam ah l pannateu hi chanchinpha gen l hinaw ahi. Pau leh ham leh sum leh pai taaksap ziakin kua zosia a kuandawktu in l pang thei pua,

maleh chanchinpha genna ding ah lampi chuam chuam ah l pannateu hi a kuandawktu l hi tho ui. A kuandawktu'n le l thaw gual tuk leh Pathian dawidan tak ah a sep diak lo chun lawman musang diak lo ding ahi. Tichun a kuandawktu leh a thawtu ah pangten Pathian apat lawman kibang l nei uh ahi. Mission ngaidan hung kikhel in a til ah kochuam chu a sawltu hisek chu tun sawl ah um (a kisawl) i hung hi tau ahi.

**Missionary ding ah Titna:** Missionary hina ding in Pathian in Qualification a phut pua, Advertisement le a ngai pua, Bible hi advertisement ahi mai hi. Titna pawimaw pen chu Pathian kona kichian tak dawn hi ahi mai hi. Eima lam in tinglo lehingle i kip-iazkaw phawt ahi chun Pathian in i tinlonate a lopina kipuanlatna dingin ei mang phachuam thei hi. Etsakna dingin Mosi dang awk tak chu Israel chate Aigupta gam apat Kanaan gam ah puiluttu dingin a manghi. Jesun a nung-zui ding ah a kote hi mithiam tak leh insung hausa tak tak te ahi diak puau. Zia mimawl takte chu mangcha a hukdamna chanchinpha khawvel pumpi puanzak ding chu a tup ahi zawi. Himaleh



mithiamte le a thiam dan dungzui un a mang phachuam nuam diak hi.

**Missionary Hithei Dan:** Mi zosia hi l umna chiat un missionary ahi thei hi. Missionary nasepna dingin a neilo pen le pan thei ahi. Um mun ah thilpiak leh pauchapna l pannateu hile missionary l hinau chikhat ahi. Missionary nasepna dingin a thawtu'n puaknatna leh titakna nei ah a thaw phawt chun mat phatchuam theilo thil a um puai. Etsaknan, pawsal chapang khat hin missionary nasepna ding thawlawm dawl ahi lai in bangma piak ding a nei pua, a nei sun sun leh a itchak ma ma, a marble chu ngaikhawkna zal in thawlawm in a pe ta, zia marble chu dawina ziak in Africa lengpa chun Pathian a awi khawlaw ahi. Pastor Thangngur chun "Van lal na sepna dingin tui vat khat leh thingphel khat thil mutawm um te hi, vangam sum a chang thei hi" a ti ahi.

**Chanchinpha gen mawpuakna:** Ei un Jesu hukdamna chanchinpha l dawn uh hi a dawng naitote kiang ah gensawn ding hi Jesu ei ngansiana leh sawlna lopipen chu ahi. Khristian l hiu hi l vangphau a, taksa l chang-

kan khawlaw bak un Jesu tatna zal ah thagau hukdam hi ding l hiu. Zia gual chun thuthunglui hun achun van leh khawvel zosia si- amtu Pathian diktak chu mi zosia'n a hiattheina ding uh leh a ho theina dingun Israelte chu ala nam tel a, zia a telna chu hamphatna(Privilege) chan lam sang in le mawpuakna a keng lian zaw ahi. Pathian in Israel chate chu telchuam lehle a phatlonau a chun gawtlo in a kawi diak puai. Hamphatna chan ding lam sang in mawpuakna liantak a pia, zia chu nam dang (Jentelte) salvak ding ti ahi (Isai 49:6). Zia gual chun ei un le l khristian hinau l kisan piu a, mawpuaknau l li- angko ua ngat ah um hi l bawl diaklo uh ahi chun gawtlo in um diak lo ding l hiu. Zia chanchinpha gen ding ah Jesu ei sawlna leh l mawpuaknau hi ngaikhawk thei ding in Lalpan a thu malzawl ta hen. Amen.

--o0o--

## Thuching

~ By Thiandam

✍ Bible ah thu kigen te thupha leh hinna lampi ahi ti he ngal ah diktaka zui lo leh gui ngamlo chu ama leh ama ki them mai mai ahi.

✍ Midang a dinga hukdam na ipiak thei lo, kua man le ei piak ziang theilo ahi ziakin, Pathian chu midang a dinga zui di ahi pua'n eima a di ngei ah zui di ahi. Midang a dinga biakin kai kin lah chuleh, mi danga dingin le Bible sim diak kin. Kumtuang hinna chu mani mimal sep dan ah Pathian pawmtak hi dungzui ah mu di ahi ngal a.

✍ Bible in “nang ma thun thiam chang in la tin, nang ma thuma'n thiamlo chang di la hi,” ati hi zui-chiat din apha. Chuleh, Pathian sathau nuhi'n, Biakin ah cheng lut hialin Pathian nasem ing ka tin, hima leh Ama pawmtak guala ka sep daw diaklo ahi chun huntaw-pni ah Belam nam leh Kel-nam khenni tak leh kel-nam ah pang ngei di ihu ti hiatsa ahi.

✍ Tulai, Pathian nasepna kong hi

hen lah social lamkonga nasepna hi ta leh mi kipe zo ma ma, mi fel ma ma a ki tam ta, ahin khet khat chu, mani phat chuam na ding cheu ah fel, kochuam suzak na dinga fel, society ngaidan leh kipum khatna usia dinga mi fel kitam ta. Fel ziaka mi kisuna, fel-ziaka society, kochuam usia tam ta. Ziaka chun felna pha chuamlo laka ki kawi kang di, felna ziaka society usia te lak ah ki veng chu kochuam leh society damna ahi.

✍ Kochuam sung, society sunga mi taw ngaidan kibang theilo, mi tawh semkhawm theilo, ma'ni lunggel, phasak chia pi utten ten ah mi kal haw hi “michapo,” “thu phengphel,” “thagau ah basam deu” te ahi nuam diak sek ui. Kochuam sung leh society sunga “michapo” a ki tamtak leh kochuam leh society a khangto ngailo ahi. Chun, thagau pawlna hawitaka chang mi chu a ki ngaisang ngai pua'n chuleh khenchuam le a nei diak puai.

✍ Miphatlo na hawl sang in ei ma phatlo na ki et tup chu dam-

na leh kipakna a bukim deu sek hi. Miphat lona hawl ah misiat-na genminthang te chu agen teu sangun amau ngei chu migenminthang ahi nuam diak ui. Thu pawl ma leh zui di chu: “michun-

ga la phat a la thudik ahi chun midang le nang ma chungin phatna leh thudik na'n hung lekit di ahiu” ti ahi ngal a.

--o0o--

### **Nute Ni Sermon:**

## **Thupi- “Nu mantam dan leh Insung ah a dinmun”**

**(Thupilte 31:10 – 31)**

- Rev. S. T. Kaia Vaiphei

**Thumapui:** Tu tha sung hin “Nute Ni” (Mothers’ Day) a um ziak in nute mantam dan leh insung ah a dinmun uh chawmkim cha’n vak gen hi tiu.

**1. Nu mantam dan:** Ei thingtang mite hi a tangpi in zi man /numei man hi a tangpi in sial (mithun) sawm ahi. Eimi lak in le Mizo, Hmar leh a dang dang sial sawm man zo lo le um in a, chun tulai in eimi lak in le ‘Ka chanu man la puang ka’ ti pawl le a um tho hi. Maleh custom dungzui in a tangpi in sial sawm ahi.

I Bible chang taklat chun, “Numei pha kua’n a mu zo diam? a man chu suang mantam san chi (ruby) sang in a tam zawi” a tia, ka gennawp chu numei pha/zi pha man chu sial sawm man sang

in le a lul zawi. Bible in a gen ruby diamond (suangmantam san chi) hi suang mantam lak lak in le a man a tam diak a, himaleh zia sang ah chun le numei pha/zi pha chu a man tam zaw diak ahi. Solomon zi tamtak neipa hin numei lultan/value hi he diak dan hi ding ahi. Nu chu insung ah pawimaw pen ahiziak in home minister ti sek ahi. Thupil ma chun, “Numei ching in a inchen a kisi-am daw in, a ngawl in vang ama khut ngei in a phel zak ahi, a tii. A tangpi in numei chu pawsal bei in a khawsa zo a, pawsal vang

numei bei in a khawsa thei puai. Numei meithai in a chate a kul zo a, pawsal in vang a chate a kul zo pua, a zit hi zaw a pat in zi thak ding a en pan pai sek tai. Insung leh nu hi a kizawp ahi. Pa hin insung a din a, nu in a enkawl ah a suhing hi ti thei ahi. Insung limna leh kipaknate, kipaklona leh kekzakna tiang in nu khut in a kinga ahi. Sungkuan boruak siamtu pen le pa sang in nu ahi zaw sek hi. Nu pha leh phalo in khawtang tiang in a khawi pha thei sek hi. Thu leh la le nu pha leh phalo chungchang a tam khawp mai hi. Bible ah hin le zia lam chu l nei sau sau ahi. Sungkuan leh mihing etkawlna nu pha a pawimaw a, **George Herbert** chun, “Nu pha chu ziltitu zakhat tawh kibang ahi” a tii. America President lopi tak **Abraham Lincoln** in le, “Ka bat hi dit ding hileng, ka nu ka bat hi dit zaw haksa pen in a”. a ti ahi. Langkhat lam ah nu phalo in mimal sungkuan leh khawvel a suksiat nasat thei dan hi gen ding tamtak um kit in a. Gam leh nam, kochuam leh mihing hinkhua siamphatna na hi insung apat pat a ngai hi. Insung ah pat ding chun nu pha a pawimaw pen hi. **Nepolean** in “France

gam in a taksap pen chu nu pha ahi” a tii. France gam ah chun nu tamtak um ngei in a, maleh nu pha tasam hi ding ahiu. Zia hi l gam khanmawbawk ahi. A langkhat kit in **D.L. Moody** chun “Nu zosia hi ka nu gual hileh khawvel ah hin suangkul siam ngai puan a” a la ti kit ahi.

**2. Nu chu sungkuan pawimaw dawnhuna ahi:** Insung mite zing an nekzaw ah eima na chiat sem ding ah l hung kiguanggal tak leh henu, henu ti hi a gi tam sek ma mai. Khenkhat in bang ka ak ding ahem, zia chu, zia kha khawi ah a um em? a ti chiat ua, zia zosia chu nu chun a dawnhu fel vek nung tak leh mani na chiat in l chia thei bep sek ahi. **W.M.Thackeray** chun, “Naupangte muk ah chun nu min hi Pathian min tuk in a lul ahi” a la ti ahi. Nitum ah nasem chawldam pawimaw in lam hungten le nu a gen gi masapen kit ui. Zia chu a um em? zia chu lei la bawl piak em? ti’n nu dawnhu ding dawtna ma l kengkhawm kit sek uh ahi. l Bible chang taklat gual in nu ting chun insung mite pawimaw pe ding in a sem gim a, guanggalna fel tak a nei a, ama ziak in sungkuan a lamzang a, a insung miten a

pawimawu a mu sek ui. Nu pha chu insung mite pawimaw dawnhuna hi ding ah a kiguat a ngai hi. Zia gual chu a hilo chun nu chu insung taksapna tuntu ahi thei hi.

**3. Nu chu Insung mite kan khawmtu ahi:** Sungkuan pawimaw dawnhuna nu chu sungkuan kan khawmtu phapen ahi kit hi. Pa leh chate, cha leh chate leh pawsal insungmite leh ama insungmite, chate leh a lawiteu leh a pawsal lawite leh a seppite, insung ah kankhawmtu phachuam pen chu nu ahi. Rebeka pawsal nei ding chu a suapinuten a sing ah sang tamtak nu hi ding in a thadawk uh ahi. Cha tamtak nei ding ah a dawisaknau thu chu a hi ngei a, zia lo a chun, nu pha chu a chate ding bep hilo in a pawsal a ding bep hilo in, a pawsal insung mite ding ah nu ting, in hunglut taphawt a ding leh lawi leh pai leh malzinte ding in le tilkhona phatak hi ngei in a. Ziagual tuk ah sungkuan kan khawmtu ding ah pawimaw chun kan khawm lo ah a khenzak lam ah a phatchuam viau chun sungkuan sukek theitu pen ahi kit hi.

**4. Midang lak ah suangkuan mel kilatna ahi:** Sungkuan ah pa hatlo leh nep tak le nu pha chun

a selkhu thei sek hi. Nu phalo leh lepchia chu pa melkhu zaw gual ahi ngai puai. Pa phalo sang in nu phalo hi sungkuan in a thuak zawi ti le hen kigenkhial lo mai thei ahi. Ziaziakchun nu chu midangte kiang ah insung mel kilatna pen ahi ti thei ahi. Mi in ah khawlai l len tak leh ahem, l zin tak leh ahem, pa pen chu thip bek in um lehle, nu in ei holimpi phawt chun l ngam thei a, l zalen sek hi. Ziagual chu hilo a, nu pen a thip hiat hiat chun pa chun ei ho lumlet lehle a kimuang thei diak puai. Nu pha chun sungkuan zia phalo lai le liakhu in a phalam in a kilat sak thei a, nu phalo chun sungkuan hawina zosia le sumangthei khawp in sungkuan a sumualpho thei sek hi.

**5. Nu Ettawn Ruth:** Jentel numei Ruth chu a pawsal thi nung leh kinepna bangma a neilo nung in le a pawsal lungsiatna ziak in a tekpinu Naomi chu Moab ah kipat in Israel gam Bethlehem ah zui a gua, a tekpinu Naomi in a zakda phat in a kiang ah, “La mite chu ka mite hin tin, la Pathian chu ka Pathian hin tin, la chiana taphawt ah chia ing ka tin, la thina ah thi'ing ka tin, zia chun kivui ding ka hi, a ti khan ga lopi

tak a sua ta, Hukdampa Jesu pi-anna phunggui kisimnan a pan khawlaw ta ahi.

Ruth pawsalte sungkuan vang-siat dan et in a Pathian uh (Israelte Pathian) chu gin taak ah ngai haksa mai thei ahi. Maleh zi pha hi ding dan tak gual in Ruth chun a pawsal a lungsiat a, a pawsal sakhua chu le a musit pua, a pawsal thi nung in le a pawsal nu, a tekpi chu a lungsiat zui zel a, "La chiana ta phawt ah chia'ng ka tin, la giakna ta phawt ah giak ing ka tin, la thina ta phawt ah thi'ng ka, a ti thei hi. Ruth lungsiatna leh ginumna hi a nasat tuak hi. Maleh Israelte Pathian, Jehovah chun ziagual nu ginum chu a kiheisan pua, dinmun sang tak in a laang kai ta ahi. Ruth mizia dang kit khat chu a kingaitawmna leh a thunuaigawl-

na hi ahi. Meithai pitek Naomi a pat bangma kinepna ding um talo chule gentheipi ding huam in a zui ahi. A zui kit mai le hilo in, a thu a nung a, bawl ding a gen ta phawt nial lo in a bawl zel sek hi. Mi genthei pente bawl gual in mi lou ah bulep hawl ding in a sawl a; zia ding ah chun mi lungsiatna hawl a ngai a, na niam tak ahia, ut umlo tak ahi. Ruth chu thuawi tak in a chia mai hi. Zan ah Boaz kiang ah chia ding in a sawl a, zia chun le a chia mai hi. Ziaziak-chun Israel lal lopi pen David chu a tupa a hung hi ta, Jesu suantute lak simkhawm khak a hung hita ahi. A kingaitawmna leh thuawina gasua lopitak hi mupha hen la hileh, maksa ma ma in a. Simtute le Ruth gual ah nu/pa manpha hi ding in Lalpan malzawl ta hen.

--o0o--

## Nungak lai in nungak hinkhua mang in...!!

~Rev. Seilunlal Vaiphei

Nungak kitihî aman tam a, numei zosia hawi lai tak chu ahi. Ziaziakchun, nungak lai ah nungak hinkhua mat ding hi thupi tak ahia, Pathian thu tawh le a kituak ahi. I nungak hina hi Pathian ginna leh ja pum ah kimangcha zingte chu khawnung ale Pathian apat vangphatna chang ding ahi nalai ui.

↳ Nungak lai in bawl ding hawilo chu bawl da mai in. Siatna zosia leh nawpsakna zosia bawl dingin kigel himhim ki'n. Zia chun nanga dinga thilpha himhim hunsua lo ding ahiziakin Pathian lungnatna bawl dawkhî ding la hi.

↳ Insung ah nungak hingala, khawlai ah nupi hinkhua mang a tamtak ziakin pilthei tak ah hinkhua la mat a ngaitai. Dawngma nei chu sual ahi puan, ahinla kingai khel lam ah tatna vang chu sual ahi. Ziaziakchun, nungak la hi lai hin nungak hinkhua mang tei in.

↳ La kingaipi zosia chu la kichenpi ding ahilo ziakin phatak in kitêl in. A ziak chu pawsal tamtak in la taksa bep a etla ziaka nang hung lungsiat taktak lo mai thei ahi. Ziakachun, nungak lai ah dawngma

theng theng(sang) ziang hile chatvai taklatna khat ahi ziakin dawngma lam ahin ginum tak in pang inla, Pathian dawng zing pum in kilungsiat hinkhua mang in.

↳ Nikhat chu pawsal hung nei ding la hin, la pawsal anga la ginum thei na ding a chun la nungak lai in ginum tak in hinkhua mang in, ginumlona kiti hi nungak hinkhua ah thil lau um pen tak khat ahi. La ginumlo khak leh la hinkhua ah la kipa-kna tasam zing ding, la pawsal nei na ale la kipakna bukimlo hial ding ahi.

↳ La hinkhua ah la lungtup khat la mualsua masia chu dawngma ah la kisukbuai lo ding chu thilpha ahi. Nu leh pa'n lawting ding ei dawisak ua, lekhate ei sim sak uh ahi ziakin, lawtinna khatbek nei ah pawsal nei dinga kiguat chu thilpha ahi. Zia

chu la mualsua na dinga chun nungaklai hinkhua chu chingthei tak in dawngma kisukbuai sak ki'n.

↳ Pathian dawng in lang hinkhua kitup tak in mang in. Nikhat chu pawsal nei tei ding la hi ziakin Pathian la dawtzing lo leh ahilo khat tawh hung kicheng khanla. Pathian kianga pawsal pha la dawt zing leh a lampi a hung guanpiak ding ahi.

↳ Nungak pha hi khawitak in um leh le, tangval phatak in a hawldawk tho tho sek ahi. Nungak pha chu a kisel sawt thei puai. Ziaziakachun, umchanpha ah hinkhua la mat chun la umchan phat ga chu la hun luak teitei ding ahi. Pathian inle nanga ding ah mipha hung guang piak teitei ding ahi.

--o0o--



# NUMEI PIL IN A INCHEN A KI SIAM HI

By: Joujam Phaihel

## Prov 14:

1. Numei pil chun ama In sung ding a kisiam in, a ngolte chun vang amau khut ngei in a phel jak sek ui.

Awle, Numei Zosia hi Nu ahisuak kei puan chun 'Nu' kiti zousia hi le NUTING ahi diak puai.

Tuhin keima ngei hi le 'Nu' khat vang chu kahitan ahinlah Nuting kahi zo naipuai.

"Numei pil in ama inchen aki si-amphat'in" ti thuhi vak ki suichian le ti chu ahi. Ahi innchen aki ti phat leh zia tak khawvel a ium sung ua l chennau inn hi ahinai, himahleh le Pathen-in/Bible-in adawi dan chu taksa innchen hizaw loin thagau lamzawk atina hidi'n ginchat aum hi, mikuatawbang numei chun ainnchen khok sak henlang sum le pai innhawi loupaha tungdok maleh, asiampa Pathian hukhingna thagau lama ataksap/aneilou leh zia chu Lal-pa mu ah numei pil hitheilou ding ahi.

Korea nupi khat chun anngawlin biakin sunga ni 10 a pauchap in , mikhat chun bang ding ah angawl ah la pauchap a hem?" Ti adawt lai ah chun zia korea nupi nuchun "ka pawsal hi Pastor ahin ahinla thagau lama a tasam mama ziang in ziazia-

achun thagau lama ahat theina dinga anngawl ah Pathian kiang a pauchap sek ka hi" ti in a dawnhu hi.

Ziagualma chun numeite hin thagau lama innchen ki si-amtup hi imawpuak nau ahi, kua hileh pawsal phalo, judon, le iki chengpi kha thei uh ahi, ahiloleh Officer, Kochuam upa, Pastor, Missionary le iki chengpi kha thei ui. Ahi thagau lam ah l pawsal teu ahat uh ahi leh kipak um mama in tin, l pawsal teu ahat lai in eimau hin numei ngawl insung phelzak te gual in um puai tiu, pawsal thagau lama hatzolo tawh i kicheng khak tak in le lungneu lo ah numei ten pan ilak ua l pauchap piak zing ding uh hi a pawimaw mama hi.

Chapha, chahawi, pil le thiam chu kidawi suakkei ahin, ahinlah cha miphalo, hisello, chu-

leh cha thu awilou le inei thei uh ahi, ahinlah lungneu lohiala Lalpa Pathian kiang ah l pauchap zing uh angai hi.

Adiakin ahithei chan in anngawla pauchapna mat hi ahoi mama ziang ah, l pauchap lai chun, an i ngawl laichun haksa ma leh i dawtnau/l pauchapnau vang Lalpa Pathian-in ei lawtinsak tei hi ti keima ngei in kahetchian ziakin kahung gen ngam ahi.

Keile ka pawsal hi a tangval laiah pat kochuam lam ah kimangcha ahin fel le afel mama ziang a, zu kiti hi leh bng ti gual a hem ti akama a lut khak lo ziak in a he puai ti thei ahi, ahinla kochuam lam ah zia sang ah aha ki matchak ding ka daw in ziaziaakachun a guk in anngawlin Pathian kiang in ka pauchap piak sek hi, khatvei chu ka pawsal kianga "Kochuam upa lahi theina dingin Pathian kiang a ka hung dawt piak sek hi" ka ti leh ka pawsal chu alung ana mama ziang ta, aziak chu ka pawsal in agendan achun "Kochuam upa kiti hi mawk thatnawp ding ahipuai ken kapuakzawlo/katingzawlo ding ziaka ka no-plou ahi" tin a gen hi. Ahinlah

kei chun ka pawsal Kochuam upa ahi ah Pathian na zia sang kaha sepzawk thei na ding ua anngawla ka pauchapna chu Pathian in ei dawnhu in tuhin vang Pathian lungsiatna zal in Ka pawsal tawh lung ki tuak tak in Pathian na ka semkhawm thei tau ahi.

*(Lalpa Pathian ka pak ahi)*

Ahi ka suapi doitak te haw inn thupi taktak sunga um le um Hi tiu in, inn neu chacha ahilou leh inn le neizolo mi inn lua ah um le um hitiu ahinla lungneu puaitiu mit ah etah muthei inn hawhi Hilo in , mita et ah mutheilou inn lopi tak innchen Pathian a pat in kisi-amtup zaw hitiu, ziatlak khawvel inn lopi taktak haw leh, pilna thiamna te hi i thi phat uh leh Van gama i puaklut thei diu ahipuan, ahinlah i thi phat uh leh i puaklut theidiu igou thupi pen ding uh chu ahi leh ipawsal icha teu thagau chu Pathian angsunga ipuilut na diam uh? Ti hi ahizawi.

Ka suapi ka numei chankhawm pite, adiakana Nu hunghi dingtele, Nu hizinglai te dinga tinglo tak ah kahung zik hi asim zosia Pathian in hung mal-sawm chiat ta hen. Amen.

# VAIHAWMNA DIK TUI GUAL IN LUAN SAK UN

-Upa P. Boijoy Vaiphei

Tulai khang ah kochuam leh khawtang ah vai hawmna dik ataksap tak dan ei uh gen sese ngailo ah mit ah muthei ah kilang to zel mai ahitai, Nang uh, kei uh iki ti tua kal un Setan in panmun kitup tak mai ala khaw man tai, Khristian sungkuan khat, Pathian vaihawmna dik meisel chawisang tu ding atasam mama tai. Pathian lungdamna tak kochuam a tawm talaw tai, Kochuam le khawtang ah vaihawmna diktak taaksap dan sut seng puai tiu. Khawvel gam ki Vaihawmna buan hakaltui luang in agam leh agua aban ah achuplet ziang takna gam ahin, Vaihawmna tuihing luang dildel cha chu than-gai aumngei e maw; A gamtin hi la tui ngawn ahia, maleh dawnding tui vatkhath chale mu in aum tapua hila..!!

Amos kiang in Lalpa'n "Vaihawmna dik tui gual in luan sak unla, diktatna chu luitui luang let gual in" (Amos 5:24) ala ti kha vak ngaitua kit hitiu e. Thodawk kit talo ding ah kipuk chu nungak thiangtho Israel ahi, ama gam ah nutsia ahi ta'n, ama kaitho ding khat le aum ta puai...Ei hawl un, ti chun hing in lau ala ti ahi. Unau, thil ala bawh khial ukha, a vaihawm dan uh ala diklo zia chu ahi pen hi. Kul kawtkhak ah zilgai pa chu ahua ah, thudik genpa chu akidak un, mi genthei te la atawden ua, abu neisun uh alakpiak ua, Amau chenna inn ding bep aki sak tau

ah, mi diktatte asu genthei ua, gawlgukna alau ah, vaihawmna kawtkhak bul ah mi tasamte ala sawn dawk ua, zia chun Lalpa mit atung zo talo uh ahi kha lam; Tulai ah gitlo na hua ah vaihawmna dik ngaina tu ding mi tawm talaw tate lak ahin, Lalpa'n genawp anei zing hi. Bang gual in gen leh I hethei diam uh? Bang tin gen leh I pawm thei zaw diam uh? Khawlai zosia ah mauna a hung um ah, lamlian zosia ah 'akhawk na e, a khawk na e' ti ah kaa la thiamte kaa La awi git chu ahi tamai diam leh maw I taksan tak ding uchu? Ahilo leh I lo ua thaichi te leh I gangual teu lak ah

a thil bawlthei na mel a hun suk lat mai ngai ahita mai diam leh maw? Ahiloleh, natpi hipite haw longal in ilungthim uh kaihei zolo di khat to ahi ta diam leh maw?

Lalpa'n vaihawmna thiang adawi ahi. Lalpa'n ki thunun dan dik adawi ahi. Lalpa'n ki zawp-dan det tak adawi ahi. Lalpa'n ki puihuaidan thiangtho adawi ahi. Lalpa'n ki thunun dan leh ki zui dan dik adawi ahi. Zia gual thil te ading achun puitu ah guat ihi em ahiloleh nungzui te lak ah pang ding ah ei guat ahi zaw em ki sutnawn hitiu. Zia gual vaihawmna dik chu chawisang ding ah guat leh se ah um chuam l hi dan uh vak thil kit tiam hi tiu. Pui tu va hi khel angai pua, Nung-zui lak ah khat hi ziak ah thipsan ziang ding le ahi diak puai. Kochuam gam leh insung te ah vaihawmtu ten apetpet ah thavenna ahipo leh ti ah umhiathiat hun hitalo ahi. Insung ah mi nu mipa te leh khawtang ah puihuaitu ten ei guattu leh ei hi sak tu Pathian dawigual ah insung khawtang leh kochuam te l puihuai zing sek nau em?

Zia vaihawmna chu tu ding ah ahun guattu dawidan khel lam ah nang leh nang ki suang tak

ah nangma cham ah vaihawmna khutvai ziang mai sek lahem? Lalpa Pathian guat la hi dan gel dawk zel sek sam in lang, thil bangkim in ahun guattu chu dawng masa sek lechun ama'n ngaitua siksek na ding hi ven maw ( Prov 3:5) Tulai gam vaihawpna te hi, bangma hechianlo mipite lungkimna lam bep ah thupukna siam ahi sek tai, Pathian tawh ki gamlat lam hepha talo ah, mit ah muthei mihiamte lungdam na bep ah um na gam ahi tai. Israel chate Shitim akipat akitawldaw ua Thiampu ten Thuthung thingkuang azawn lai ua mipi te tawh akikal uh Tawng sangni ah aki kak zing ding, zia sang ah chu naizaw ah ki zuilo ding ah thu akipiak ukhan, ei uh a ding in le zillai pawimaw tak eipia ahi. Lalpa'n Joshua kiang in tuni hin Israel te zosia mitmu in hun chawihawi pan ding ka hi tai (Joshua 3:7) ala ti kha; Tulai kochuam gam ah puitu te hi eimau thiamna leh khawhiatna te suang ah mipite lak ah eimau ki bawlkawm chawihawina muding bep lunggul ihi tak ziak un, Pathian in mun anei zo talo ahi.

Lalpa'n Samuel kiang in 'A mel lat dan in en kinla, a pi-

andan a sâ n lam inle en diak kinla, ama chu ka daw i ei puai. Mihiam in pawlam etdan in a en sek ah (Samuel 16:7) ala ti ahi. Ei un taksa lam thil ngawn en ah, thil lemchang thei cheng lakhawm ah, taksa gam ki lunghawl tua kawm ah Kochuam a puitu di ila tel/guat khak sek uhi kochuam a ding a natna hikpi ano/achi iki tulut khak sek uh ala hi sek ah, Kochuam neitu Pathian lungnat na channa ding bep ala hisek hi. zia gual thil chu he sasa ah ila bawl chang uh bang a um thei ah, hetlo kal ah ila bawl khak uh bang le aum thei ahi. Ahi'nla Lalpa'n 'Hun nusia ngai puangka tin, hum pampai ngai diak puangka (Heb 3:5) ala ti tak gual in tuchan ahin Pathian hatna zal in zia natna hik te chun chi suang sawn manlo in, athat mit sek ahi .

Dinmun kiti leh mawpuakna kiti hi vak ngaitua thak hitiu, Pathian in a mipite puitu di leh, nei leh go te enkawltu ding ah mi tamtak lak apat muan um leh ginum chuam ah a ngai hi ala um ahi. Zia gual dawisakna va chan khak chu a lopi in a ngaisan um in a lul mama ahi. David chan tumte, Joseph chanchinte le Mosi te leh Pathian in Samuel

kiang ah athu vaithak dan te kha kha vak gel daw k thak leu hin, dinmun kiti leh mawpuak na kiti hi eima le eima kiguat galkai chi ahilou dan a chian tawk hi. Chun, a Guattu Pa lunglo lam a pet khak aum thei bak in ginum tak ah pan galkai thei ahi dan mu thei ahi. Tulai kochuam puitu te hin lunggel thak angai mama tai. Anuam leh bailam ding lam bep, Mite gensiat lo thei na ding ham leh mi te maipha dawn na ding lam ham bep buaipi na in kochuam gam asu se nasa mama ta ahi.

Kochuam gam vaihawmna ah diktatna tui ah luan sak leu hin, mit ah muthei thagau liangvai tamtak panpi tu le sawmdawltu di bei te hin zia tuihing lui chu hun nai in tiu in, ei uh va ko leh chial le ngai khel ta puan tin, amau in hun nai mai ding ahiau. Zia diktatna luitui luanglet sak tu ding achu nang leh ken mawpuakna inei hi. Tulai kochuam leh khawtang puitu ten l muchian lo uh leh l hiatchet zaw sek lo ziak uchu l umnau pindan sung bep ah ilung damdam ziang ziak uh ahi, va pawt daw k ah, a tuallai ngei ah alum leh vawt va hiatpi ding ah guat leh se ah um ihu ah, l lung-

damnau pindan apat ki awi tak ah tukvel apat gal thîl mai ziang ding ah guat leh se ah um ki hilo ahi. I umnau kawtchabi ei mau ngei ki kam chu ei mau ma in hawng hitiu in va pawt dawk ah, panpi ngaite va panpi ding leh puihuai ngaite puihuai ding leh sawmdawl ngaite I pindan sung ah puilut ah sawmdawl ding ah guatna lopi tak chang ihi zia uh vas u lang hi tiu. Midang hung kipan leu ngai thiam paw khai tiu.

Pilvang tak ah hinkhua mat ahun takzet tai, kikhel thei ahi. Vaihawmna hi damsung ah tuk det ding aum puai. Hun khat hunkhat leh kithen kual zel ahi sek ngal ah, Chutpha chungnung leh sang ah khutvai tu ah ipan hun sung uhin ei siam tu leh guattu lunglam bep in bawl zaw tai tiu. Zia gual chutna sang ah chu ziang lo ten le aki chulai ten lamdik ah apuihuai thei ding un tawsawt in I thaguan ding uh ahi zawi.

Lalpa la Pathian hi Pathiante zosia chung ah Lal, Pathian chungnung pen, hat leh lau um tak, kua ma dawichuamlo leh gawlguk na la ngailo leh, nau-chaga leh meithaite diktak ah vaihawm piak, gamchuam mite

khawtua na taklang zingah, a nek ding sil leh chen khawmtua zing ahi ngal ah, (Dan lekhabu 10:17-18)

Lau thawn um tak ahi. 'La kutteu ka hua hen, bang ma'n ka ngai puai. La khawmpi gun tak-tak teu le ka kipakpi puai, Hal-mang thillat leh thai thillat hun lan maleu chin, ala pawm lo ding ka hi. La chamna thillat uh ganca thau taktak te chu le hun ngaisak diak puang ka, la lasak gitteu ka kiang ah kipat la mang un la, la tingtang gi hawiteu le ngai tha puang ka. Ahi, Vaihawmna dik tui gual in luan sak unla, diktatna chu luitui luanglet gual in luan sak phawt un, ti ah Amos kiang ah Pathian kamsuak hi ahing zing ah, tuni chan ahin thilbawl thei gu hat tak nei thu mantam tak ahi ti hemil puai tiu. Guat ah I umnau hi ei guattu Pathian lopi na ding bep in mang zaw thei chiat gaw tai tiu.

--o0o--



## **Pauchapna ah panpi ding ah dawtna**

*26<sup>th</sup> May 2021*

Pathian mapuina zal in Gangpimual in KSP Biakin thak ding 2018 kum ah ala sak pat uh chu mit ah muthei in zia tiang atung thei tau hi. Kochuam puitu nu leh pate kinep dan ah chun, Town Pastor Bial khawmpi 2021 hun ah mat man tei a guau hi. A Biakin saudan chu ft. 86 ahia, a vailam chu ft. 36 ahi.

Presbytery khawmpi liantele zintun thei ding ah thei patawp ah panlakna ahi ziakin pauchap na'n hezui zing hitiu. Lal Jesu kochuamte luchang lopina ding hung hizel taken. Amen..!

La sepkhawmpi'u

*Sd/-*

**Rev. H.L. Vena**

Bialtu Pastor

## Nu ni mat tha ahi tawh kitawn ah

### Pate kiang ah thuthawt pawimaw khenkhatte:

-Upa P. Boijoy Vaiphei

- Nuni mat tha ahi tawh kitawn ah Nute chawisan thei na ding leh Nupan kal afel leh nawp zawk na ding ah thu pawimaw tamtak genlat l nuam ui, ahinla tuchung ahin thildang te nusia in anuai ahin Pate adi bik in thuthawt pawimaw vak sim-suk khawm hitiu in, mang phachuam ngei ding in ngaitua na pia thak dingin iki chial ngal ui.
1. La zi kha Numei ahi nai ti'n ngaitawm maisek ki'n,
  2. Numei luchang chu pawsal ahi nai ti bep petcha zing mai ki'n,
  3. Zite mimal buaina ah va ki sakla takluat chu pawsal huai lo talua ahia, zia gual hethiam thei te chu pawsal ting tak ahi zawsek ui.
  4. Pilat in a Zi thugen limsaklo ah thu diklo tak ah ala tan gual akhan, Nang in le la zi thugen limsaklo in kawi mai sek ki'n.
  5. La zi tuaidawn lai melhawina kha geldawk zing sek lechun ngai leh etchim ni nei ngai pua'n la.
  6. La zi in ahun hil na umkha te chu nang bang gual ah la u ziak ah ahisek em ti ngaitua zing kawm in ki siamphat na'n mat guazaw'n,
  7. Lawi leh pai lak ah aki lâkzaw bêklo ziak in thasân thei in mawk gel ziang ki'n. Nang pui-huai ngai ala hizaw ding ahi.
  8. Pathian in zi ah ahun piak tak chu Ama lopina hun chawisan pi ding ah ala guat ahi ziakin, bang chu bang hitaleh, la zi chu la ngaisang pen him ding ahi.
  9. La zi nungram simmaw tak ah bawl ding ah mâkpa hilo lahi ti hezing in aw, Ki pawsal sak takluat hi pawsal ting tak hi na ding ah taksapna ala hizaw sek hi.
  10. Zite thuzaw thei pawsal kiti hi pawsal ting tak hizaw ahiu ti



hemil ngai ki'n.

11. Nupân pankhawm thei chu thilpha ahi nai ti thu ah zite nîk-chenlo bep ah kibâk ki pawsal sak mamate khel ah numei zaw umlo ahiu.

12. La zi leh chate tawh la ki gamlat phawt ua leh Tangval lai hinkhua mang maisek dîng ah kilawm la kisa nalai himhim em?

13. Huntin ah lakhut ah lachawi zing leh la hiatmil theilo, minute khatziang cha le la chawilo theilo ah la gel la Phone sang ah chun, la zi lunggel hiatthiam gua zaw zing sek in.

14. La zi in nisin matchak dîng sum leh pai ahun hawlpi theilo ziak in simmaw bawl thim zing sek ki'n aw, Nang bel ah khutngawn ah hung lut ahidan la hetsa ahi ngal ah,

15. Insung leh khawtang ah aki matchâk dîng la mawk zâkda sek ziak ah, lazi in mi lungthim abat zawlo nate simmawna ah la nei zel naklai sek chu dik in la gel na em?

16. La zi in a sepman lo leh

asukhial khak te ziak in la hânkhum zing sek ah, nang sukhial khâkte ah la ki thiamchan zel sek kha thil kilawm him in la gel em?

17. La zi leh cha lungmawl takte khawhelo ah la âng ah ipmu lîflit te chu, ahun petu zal chauh ah zia tiang chu tung ahiu ti la gel dawk in la pauchap zing sek nai maw;

18. Diklo tak ah lalut ah zi leh chate vâkva sek ah, mite mitmu ah kilawm tak ah cheimawi zing sek Pa la hi chun, la tunung Gu dîng la hedawk nai pua hi'n ah, bawlzawm chi hikhello ahi;

19. Kochuam leh khawtang siamphat na dîng ah mawpuak na nei Pa ting khat ah la ki gel chun, amasa pen in la zi chu lungsiat in duat bawl masa phawt himhim le chun, la vei leh chang ah lapuk khak pal ni leh ahun kai dîng tu dîng chu la zi ma kha ala hi zaw dîng ahi.

20. La zi tawh nitum in tha la kuan khawm ua, la zi le nang chawl gual tho in achawl ve ah, vai-tun hun in la nek leh chak dîng

- ahun bawlpiak kit ah, nang la ki chawldam hiau maisek kha, pawсал tingte um dan ding in akilawm puai.
21. La taksa bâk khat, mutheilo la nâkgu, muthei ah la zî ah hung kisiam ahi tâk ziak in la lungsiat diak sek ding ahi.
22. A pianna insung leh aphunggui mansua hial ah nang hun bel ah, Thisan naisan tawh gochan hun hin piak ah, Pa ting hun sua la zi chu nang-ma taksa bak gual ngei in la diam ding ahi.;
23. Khawlai ah mizite lak ah aum phat leh tai hiauhiau zing mai, Insung ah azi kiang atun tak leh a lungna sa, aw sâng zing sek Pa khel ah pa tinglo leh mi-vangsia umlo ahi.
24. Nang Pa pen, khawlai dung ah thulak theilo hial khawp ah la um thânhuai zing sek ziak in, la zi leh cha ten a nisin hinkhua uh zachat na'n amang zing sek ui.
25. Pa ting ah hun siamtu Pathi-an kiang in kipak thu gen chawl ngailo in gen zawm zel in.

--o0o--

## **Presbyterian Women Fellowship(KSP) Revival Khawmpi Report**

Ahun: 16<sup>th</sup> -18<sup>th</sup> April 2021

Amun: Leilon Presbyterian Church

Thupi: “Aw Ka hinna hat tak in chia pek in!” –Vaihawmte 5:21

Speaker: Evan Kamthang

Presbyterian Women Fellowship, Khuga Sadar Presbytery saina ah Revival khawmpi matna report pethei ding ah hun pha ei petu Pathian kiang in kipak thu ka gen masa ahi.

Mulo ah programme ala kisiam te chu achiasa Dt. 16<sup>th</sup> -18<sup>th</sup> April, 2021 sung khan Leilon Presbyterian Church mun in ala ki mang hi. Zia na hin Dt. 16<sup>th</sup> April 2021 nitak in Rev. S.T Kaia Vaiphei, Executive Secretary KSP i,c PWF in Revival Khawmpi programme honna a nei hi. Chun, programme a ki guat te haw Hunvawptute, thupanding te, thawlawm lan ding te hi leh kikhawp si'n ah hunkhakna nei ding a ki guat kawm te ngei in le Pathian mapui na zal in a pan mun teu a lua chiat thei ui, zia ban ah chun programme a guat lawk hilo maleh Pathian chawihawina la kilawm tak tak Lapawl bep hi lo ah mimal unit chuam chuam a hung taikhawm te pat le ngaithak ahi . A bik tak ah Speaker ding a ki guat Evan. Kamthang ngei in le “Aw ka hinna hat tak in chia pek in!” (Vaihawmte 5:21) ti thupi pan san in Pathian thu hawi tak tak te gingtute I nisin hinkhuau kalsuan na ah mat chak dinga poimaw mama te ei gen piak in mipi Revival Sîm a kalsuan tute le tai tak leh lim tak in Pathian biak khawmna hun mat ahi. Chun, Zingkal Devotion puitu dinga ki guat Mrs. C.Hoikim leh Mrs. Tingnu te'n le a hun pawimaw tak teu lua thei in mipi taikhawm te a ding a Pathian thu a kitilkho na thu hawi tak tak te a hun gen piak ui. Chun, Dt.18<sup>th</sup> Sûnnung dak 1:30 in Sacrament guanggaltu dinga kiguat Rev.Lienthienmang, Sadar District bialtu ngei in le Pathian mapui na

zal in guat ah aum na te lua thei in mipi taikhawm tute zosia tawh 'Lalpa Anthiang Ah Kipawl Khawmna' hun mantam/pawimaw tak lawk tak ah mat zaw ahi. Chun, Dt 18<sup>th</sup> April 2021 a tawp nitak in Upa Tinkholam, Moderator Khuga Sadar Prebytery in Hunkhakna nei in Revival khawmpi Programme chu Pathian mapui na zal in taksa leh thagau ah lawk tak ah mat zaw ahi.

District tin/Unit tin apat malzin 107 vel giaklut thei in, sîm tu mi 300 vel ahi. Chun, zintintu khawtual Local, PWF leh khanglai te ngei in le malzin te giakna kitup tak, nek leh chak kitup tak te ei bawl piak ziakun amau chung in le kipakthu I gen uh ahi. Upate leh Pastor te'n le khawmpi ei hung uap pi ziakun a chung un kipakthu I gen uh ahi. Maban a le tusang ah dinmun phazaw ding thei ding in Lalpa'n malsawm in amau pui zel ta hen. PWF te le tusang ah Pan nasatak ah la zel ding leh masawn zel ding in Lalpa'n I mau ei pui piak ta hen.

--o0o--

## PRESBYTERY SUNG THUCHUAM CHUAM – May 21

1. **Cachar Biakin:** Mission and Evangelism Committee malakna Cachar Field Biakin sakna ding in Date 23<sup>rd</sup> January 2021 (sat) zingkal 8:30 Am in KSP office bearer te leh M & E Committee memberte a thei thei chiakhawm in Foundation Suangphumna Upa Tinkholam Moderator in a nei a, 25<sup>th</sup> February 2021 in CKKP Comtt. memberten a foundation a cho ua, Date 30<sup>th</sup> March in M & E Comtt. memberte a thei thei kuan in inn sak pat a hin, Date 23<sup>rd</sup> April 2021 in zaw fel ahi tai. Tuhin a hawn ding bep a vat ta, Biakin sakna sen zosia kigawm in ₹ 1,93,555/- (*One lakh ninety three thousand five hundred & fifty five*) ahi .
2. **Upate Seminar:** Upate Seminar chungchang hi “Damna AW” April tha issue a khan kimang zo ta in a hung ki report ta, himaleh matna ni ding ah I la guat 26<sup>th</sup> March 2021 a khan thakhat thu in ATSUM bandh ding a hung kigen khak ziak in a hun chawn ahia, Damna AW pawtnai lo maleh press lam ah a kipiak man tak ziak in sukdik kit thei ahi ta pua, simtute la ngaithiamnau ka hun dawn ahi. 2<sup>nd</sup> Pastoral Committee chun a hun guat thak kit in 24<sup>th</sup> April 2021 (Sat.) ni khan Hqtrs. Church, Tuibuang ah lawting tak ah mat zaw ahi tai. KSP sung ah kochuam upa mi 64 a hungkhawm a, “Constitution and Presbyterianism” ti chungchang Rev. S.T.Kaia Vaiphei, E/S, KSP in paper a present a, “Zia gual hin a hizaw sek ui” ti a bikin biakna kikhawp chungchang Rev. Haulalven, Incharge Town District in a ziltil a, genkhawmna hun mat zaw in limlakna (Photo Session) nei in ankuang umkhawmna hun chai ahi. Zia seminar & Consultation a hin sum ₹ 84,100 /- (*Eighty four thousand one hundred*) sen ahin, chuleh pastorte seminar a khan ₹ 11,900/- a la kiseng a, a kigawm in ₹ 96,000/- (*Ninety six thousand*) sen ahi.
3. **M & E Workers Retreat:** Mission and Evangelism Committee thupukna dungzui in Date 27<sup>th</sup> April 2021 (Tuesday) ni khan KSP. M & E Workers Retreat Tispari ah nei ahin, Evangelist te leh Evange-

- list techerte chiakhawm in Rev. S.T.Kaia Vaiphei E/S, KSP leh Rev. Lienthienmang, incharge Sadar District ten Pathian thu ah ziltin-nei in hun lawk tak ah matzaw ahi nung in photo session leh ankuang umkhawmna hun khak ahi.
4. **Tispari School:** Pathian malzawlna dawng in PMS, Tispari le student kum dang sang in a kinei hawi ma ma a, school naupang 96 (ninety six) l nei ua, Uniform khuina ding kisukfel piak in, School logo kisiam piak in, chuleh School exercise book kisiam piak in phatak ah etkawl ding ti ah duthusam l nei zing lai in corona virus (hileng) ziak in a lo theilo ah chawl a hung ngai kit ta, a da um ma mai. Malam bang gual hi jel ding hem ti a gen thei ta pua, nu leh paten l pauchapnau in he chiat hi tiu.
  5. **Evan. Pautinlam:** Evan. Pautinlam chu hun sawttak mission field ah a ma chang ah thawmhau tak ah a um nung in Pathian ama lalgam nasepna a kithuapi ding Miss Lhaineiniang, Jangnuai Village a piak chu tawh kochuam dan thiangtho in Date 20<sup>th</sup> April 2021 (Tuesday) ni chun Leilon Presbyterian Church ah Rev. Lienthianmang bialtu pastor khut in a kicheng tau.
  6. **Corona Virus Second Wave:** Corona virus second wave hi a masa sang a khan le a hatzawi a tiu a, centre India lam in mi tamtak a thi tak ziak in Manipur in lockdown puang chet nailo maleh zia a pat chun kiven himna ding in SOP Order a sua a, night curfew 7:00 Pm - 5:00 Am a puang a, chun mi a pun ah 20 sang ah tam umkhawm phallo ti ziak in biakin kikhawp a hung haksa ta, a diak ah town sung ah umte ding in biakin khak a hung ngai ta ahi. Chuleh Synod leh Presbytery Programme guanggal sa tamtak ahi ding gual hi thei ta lo ding a um ta, maban banggual hung hizel ding ahi em genthei ahi ta pua, hun pangai l mat kit theina ding un Pathian kiang in dawn hi tiu.
  7. Tuithanak District Pastor Quarters maintenance na dinga Office apat Dangka 50,000/- chu a kidaizawlo zia kin, Tangmual P.C in dangka 10,000/- in abelap thei ziak un kipak a um hi.

## 'DAMNA AW' PHUNGVUKTUTE :

### PATRON MEMBERS :

- |                       |                               |
|-----------------------|-------------------------------|
| 1. Pu P. Vaiphei IAS, | Imphal                        |
| 2. Upa Henthianthang, | S.Kotlian                     |
| 3. T.Upa Haulallawm   | S.Kotlian                     |
| 4. Upa Thienkhomang   | S. Kotlian                    |
| 5. Upa Laltinkhup,    | HQ. Church, Tuibuang          |
| 6. Pi Manliankim,     | HQ. Church, Tuibuang          |
| 7. Upa D. Mina,       | Lingsiphai                    |
| 8. T.Upa Ph. Gena,    | Lingsiphai                    |
| 9. Pu. Khamlal        | Saipum                        |
| 10. Pu Khamliankap    | Saipum                        |
| 11. Pu. Tinlunlal     | Saipum                        |
| 12, Pu. S.Kapbawi     | New Delhi                     |
| 13. Upa Genhau        | Central Church, Compound veng |
| 14. Pu. Khailianbawi  | Central Church, Compound veng |
| 15. Pi Kimtawi        | Kohima                        |
| 16. Tv. Daniel        | Tangmual                      |

### MEMORIAL GIFT :

- |                                |  |
|--------------------------------|--|
| 1. Pi Deem Melody,             | <b>Central Church, (Rengkai)</b><br><i>[In loving memory of (L) Upa Lamthianlal]</i> |
| 2. Pi Rebekah                  | <b>Kangvai</b><br><i>[In loving memory of (L) Pastor Khaivung]</i>                   |
| 3. Upa Liansawmthang           | <b>Lingsiphai</b><br><i>[In loving memory of (L) Pu. Henzagen]</i>                   |
| 4. Pi. Nem Grace Boisi Capvung | <b>Delhi</b><br><i>[In loving memory of (L) Pi Vanlalchhuangi]</i>                   |

### SUPPORTING MEMBERS :

- |                           |                 |
|---------------------------|-----------------|
| 1. Upa Khomlunlal         | S.Kotlian,      |
| 2. Pu. S.Thangminlian     | Lingsiphai,     |
| 3. Pu Lelboi,             | Lingsiphai      |
| 4. T.Upa Lalneilian       | Central Church, |
| 5. Pu EL Soson            | Central Church  |
| 6. T.Upa Genminthang,     | Central Church, |
| 7. Pi. Kimneihawi         | Saipum          |
| 8. T.Upa J. Mark          | Saipum          |
| 9. Pu Genthiankap,        | Nghathal        |
| 10. Pu Lianzakhup         | Nghathal.       |
| 11. Pu Lemthang           | L. Mission Veng |
| 12. Rev. S.T.Kaia Vaiphei | Nghathal        |
| 13. Nk. Dimkhoniang       | Zikpi Tampak    |

**ENCOURAGING MEMBERS :**

- |                   |                 |
|-------------------|-----------------|
| 1. Pu K. Minlian  | Tangmual,       |
| 2. Upa Ph. Kamlam | L. Champhai,    |
| 3. Upa S.T.Siam,  | L. Mission Veng |
| 4. Pi Chhungi     | Hq. Tuibuang    |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

**(i). Patron member- Kum 3 (three) a ding in. ₹. 3,000/-**

**(ii). Memorial Gift- Kum 2(two) a ding in. ₹. 2,500/-**

**(iii). Supporting member- Kum2(two) a ding in ₹. 2,000/-**

**(iv). Encourager- Kum 1(one) a ding in. ₹. 1,000/-**

Chun, sum thawt nuamte a ding in:

**A/C name: Khuga Sadar Presbytery(MPCS)**

**A/C nos: 32483318505**

**Branch code: 6182, CCpur**

**CIF nos: 86412486695**

**IFSC nos: SBINOOO6182.**